



GETHSEMANI RÂWL

(Monthly Prayer Bulletin of Hmar Christian Fellowship Delhi)

Volume No. III | Issue No. 2 | Thlavul (February), 2025

‘Ienga khawm lunginzîng naw ro, iengkimah țawngțai le hniin, lawmthu hril sa peiin, in dithai chu Pathien kuomah inhriettirin um lem raw se’ (Filippi 4:6)

American Civil War (1861-1865) hun lai khan anni tienga Pathien a țhang le țhang naw President Abraham Lincoln an indawn a. Abraham Lincoln-in hieng hin a dawn: “My concern is not whether God is on our side; my greatest concern is to be on God’s side, for God is always right.” Pathien tienga țhang tlat ringtu ta din a pawimaw. Chu chuh hnena changna a nih. Pathien tienga ei țhang tlat theina pakhat chuh ama ditzâwnga ei țawngțai hi a nih. Jerusalem kul ram ta hnung indinthar nâwk a ni theina din Nehemia chun ‘Tawngțaina’ hmangin hma a lâk țan (Nehemia Bung 1 & 2). Jerusalem kul an indinthar nâwk ding khan sêlkaltu/dotu tam tak-Sanbalat, Tobia le Geseem hai-an um. Sienkhawm, Mosie kuoma Pathien thutiemhai le Pathien chu ama hmangaia, a thupêk zawmtuhai chung a hmangaina thuthlung vawng zing hlaktu a ni ziehai Nehemia’n a hriet chîeng a, chu chun Pathien a dâwr a, hnung kîr lovin hma a pan a. Ni sâwmnga le ni hni sîng chauhin Jerusalem kul tlu se vawng ta hnung chu an bâwl țha nâwk vawng a nih.

HCFD Kum-2025 Thupui (Thaw ro, indin thar nâwk ei tiu) a hlawtlingna din țawngțaina Pathien dâwr a pawimaw. Nehemia chu Pathien kuomah inphahnuoiin, thupha chawiin a țawngțai. Pathienin Lal Solomon kuoma (2 Kronikul 7: 14) “Ka hming puttu ka mihaiin inpha hnuoia ka kuomah an hung țawngțai a, an mi zawng a, an um dân suolhai an nghatsan chun, vana inthawkin lo ngaithlâng ka ta, an suolhai ngaidam ka ta, an ram chu thawi dam nâwk ka tih.” tia thu a lo tiem hih, vawisûna nang le keiin insîng, kohran le khawtlâng ei indinthar nâwkna dinga hin, sirsan a hmangin, hma lâng ei tiu. Pathien dîtđana țawngțaina chu indintharna bulpui a ni si a.

DAMNAW THENKHATHAJ TA DIN

•Pi Lallawmsang, Pi Rebecca Buhrii, Pu Sieka Singson, Pi Joani Darlienhnem, Pi Esther Lalramhuol, Pi Linda Chhangte, Pu Sanglawr Pakhuongte le Pu Ringlien Pakhuongte hai cancer a nthawk an hung dam fai hieuna din •Pu Thangsang Varte, pângngaia a lăwn theina ding le Pu Lalsiemlien Khawbung a dam peina din •Pu Zosangpui, mit tieng inenkawl le cornea transplant thaw zo, a dam peina din. •Pi Lalremsang, lungphu le medicine doctor pana inenkawl •Pu Robert Penatu lu tieng hatsatna leia inenkawl zing •Pi BK Rose, lu inât zo, a dam peina din •Pu Lalrozam, vun kang inenkawl mek, a dam peina din. Nk. Elizabeth Varte, lu-tluok a thisen lût leia Gûwahati-a inât zo, a dam peina din.

02.02.2025 (Pathienni)

•HCFD NSS Deptt. ta din: I. NSS Graduation Day vawisûn hin taksa le thlarauah hlâwkphana tamtak neia hmang ani theina din II. Naupanghai po poin taksa le lungril ngaituona tiengah ințhanglienna țha tak an dawng peina din •Tuta thla HCFD Chawibiek Inkhâwm huna Dwarka Vengbuk a nthawka usher dinghaiin an rawngbâwlna țha taka an phursuok theina din.

03.02.2025 (Thawtanni)

•Inchûklai le competitive êkzam dinghaiin tuta thla sîng an inchûkna țha taka an thaw theina ding le kum tâwp êkzam nei dinghai khawmin țha taka an nei theina din. •Sawrkâr le private-a sinthawtuhai khawmin tuta thla sîng hin sin țha taka an thaw seng theina din •Mimal sumdâwngtuhai khawmin hlâwk le tluong taka hma an lâk theina din •Ei khawtlângah vântlâng hrisêlna țha a umna din.

04.02.2025 (Thawleni)

•Bethany Convent School-a naupanghai final êkzam ding an ni ta a, an la thiem taw naw khawp ela. Pathienin an thluokhai a suk hrat pekna din. •Hari Vihar Mission Centre-ah sîngkuo iemani zât bêk ringtu an hung um theina din.

05.02.2025 (Nilaini)

•HCFD Nilaini Zân Tawngțai Inkhâwm-Inkhâwm Keihruoit:Pu Lalremruot Nungate, Thuhrlitu: Pu Stephan Hmar

•Ei hmun thubuoi (land case) Court-in țha taka a mi sukfel pêk vatna din.

•Vawisûn Delhi Assembly Election fel fai taka nei a ni theia ding le sawrkâr țha tak a hung ngir-suok ngêina din.

06.02.2025 (Ningani)

•HCFD Executive Committee memberhai ta din-Pathien a nthawka varna le rorêl thiemna an dawng thar peina din.

•Shiv Vihar-a rawngbawlna le inzawmin: Kum 2024-a contact-hai lai mi thenkhatin baptisma an chang nuoma, Feb. 10, 2025 (Thawtanni) khin prawkram siem tum a ni a, prawkram hih ieng khom buoina um loa hmang ani theina ding le baptisma changtuhaiin Pathien thlarau baptisma an chang sa theina din.

07.02.2025 (Zirtâwpni)

•Shiv Vihar-a rawngbawlna: I. Tu kum January thla sung hin Lalpa’n mi thar (new contact) mi 10 lai ami pêk bel sa pei leiin Pathien kuomah lawm thu hrilin, mi tharhai hin sandamna an hriet chieng theina din. II. Ringtu pakhat, a hming Pi Poonam a ni a, a pasalin inkhâwm a phal ta nawa țawngțaipui ei tiu. A pasal hming chu Pu Lalbabu a ni a, ama hi a lungril a ntlâk danglamna ding le ringtu a ni theina din.

08.02.2025 (Inrinni)

•HCFD Nuhmei Deptt. rawngbâwlna: I. 2nd Saturday Inkhâwm-Inkhâwm Keihruoit:Pi Zari Inbuon, Tantu: Pi Zairemmawi, Thuhrlitu: Pi Daisy Lalneiring. II. Nuhaiin taksa le thlarauah Pathien malsâwm-

na an dawng thar peina din.

09.02.2025 (Pathienni)

•HCFD Chawibiek Inkhâwm (Lalpa Zambu)-Rawngbawlitu: Pastor Lalditsak Inbuon, Tantu: Pi Niangboi Pudaite, Pastoral Prayer: Pastor Lalditsak Inbuon.

•Ei member Nk. Ruth Zoțahnieng Sinate-in a enkawl Parvah Tuition Centre ta din: I. Pathien dît dân ang taka naupanghai enkawl dan thar Nk. Ruth Zoțahnieng Sinate-in a hriet zuol pei theina din. II. Pathien ropuina dinga naupanghai an inchûkna țha taka an sunzawm pei theina din. III. Centre ta dinga ma loa țawngțaina le thilpeka țhang latuhai ta din.

10.02.2025 (Thawtanni)

•Hmar hnam ta din: I. Hmarbiel (Manipur) le Mizoram infepawna tuivai leilâk daw zo phuor a ni tah leiin Pathien kuomah lawmthu hrilin, infepawna lampui țha lem a hung um pei theina din II. Inchûkna le fâk-le-dâwn thilah hratlema hmasawna III. Inruithei ngawlvawinaa (drug addiction/abuse) intâng abiktakin thalai tamtak hai chu inruithei a nthawka an hung zalên theina din. IV. Manipur buoina le inzawmin inthuruol taka hnam kal a chawi theina din.

11.02.2025 (Thawleni)

•Shikohabad, UP Mission Field: I. Kohran mipuihai Pathien thua ințhanglienna, puitling tieng an pana, an ringna sukngheta a um peina din. II. Kohran member-haiin an sung-le-kuohai, an sinthawpuihai kuomah dâm Chanchințha hrilna remchâng an hmu peina din. III. Pathienin

ring thar tam tak a mi pèk sap peina din. IV. Mi tharhai (new contact: Rakshpal-hai sùngkuo, Rakesh-hai sùngkuo, Gautam-hai sùngkuo le Shashi Kapur-hai sùngkuo) lungriah Pathienin sin thaw a, suol ngaidamna change, ringtu tha tak an hung nina din.

12.02.2025 (Nilaini)

•HCFD Nilaini Zân Tawngtai Inkhawm-Inkhawm Keihruoit: Pu Joseph Buongpui, Thuhrlitu: Pi Chonghoi Inbuon.

•HCFD-in IEM-a misawnari ei support Rev. Suraj Majhi le a sùnghai (Bathinda Mission Field, Punjab a rawngbawl) ta din. Lalpa'n a vènghim peina ding le ringthar pèk belsa anni peina din. Lalpa'n taksa hrisèlna tha a pèk peina ding le rawngbawlna hrat taka an nei peina din. An nauhai Mr. Samarth le Mr. Samarpan haiin an lekha inchûkna tha taka an thaw pei theina din.

13.02.2025 (Ningani)

•Chanchintha puongdar rawngbawlna sinah HCFD-in hrat lema hma ei pan pei theina din (Marka 16:15, I Korinthe 9:16-18)

•India rama hin: I. Sakhuo zalenna a tak ngeia kengkaw a ni pei theina din II. Misawnarihai po poin Pathien vènghimna le thuoina an dawng thar peina din III. Kam zalenna dân ang taka hmang/kengkaw a ni pei theina din IV. Hnam/sakhuo tin zalen taka ei chêng tlàng pei theina din.

14.02.2025 (Zirtawpni)

•Ei (HCFD) misawnari-haiin Pathien sukhra- na le thawpuina a'n dawng thar peina ding le Chanchintha hriidarna hmangruoah nasa lema Lalpa'n a hmang peina din.

•Ei pastorhai khawm taksa le thlarauah Lalpa'n sukhra, a thuoi thar peina din. Abiktakin 'Sandamna Campaign' fe mèk le inzawmin hmalatu ei pastorhai fethlenga Pathien sinthaw nasa taka a'nlàng zawm peina din.

15.02.2025 (Inrinni)

•Rampuo: I. Myanmar-ah mipui insawrkarna a ngir nawk theina ding le India thenum ramhaiah (Pakistan, Sri Lanka le dang dang) remna le muongna a um pei theina ding le Chanchintha a'ndârâu peina din. Middle East buoina, Russia-Ukraine indonahai hih palai thiemna hman- ga tha taka chingfel an hung ni theina din.

•Ramsung: India ram North East States (Ma- nipur, Nagaland le Assam) a helna le ralthuom cheleknhai sawrkâr thlungpuiin tha taka a chingfel vat theina ding, remna-le-muongna a umna ding le hmasawna hratlema a hung um theina din.

16.02.2025 (Pathienni)

•HCFD Chawibiek Inkhawm (SS L-1)-Thuoit: Pastor Lalsiesang Zote, Tantu: Pi Rita Fanai, Pastoral Prayer: Pastor Lalsiesang Zote.

•HCFD Media Team le Worship Team mem- ber-hai bika din: An rawngbawlna/hmalâknahai hlâwk taka a fe zawm peina din.

17.02.2025 (Thawtanni)

•Shikohabad, UP Mission Field: I. Ringtharhai (ni kum a bapisma changhai) Lalpa'n a sukhât peina ding le annihai fethlenga Chanchintha an darzâu peina din. II. Naupang Sande Sikul tluong taka a fe peina ding le Naupanghai Pa- thien thu le hlai inthangliena, hmasawna tha tak an nei peina din. III. Lalpa'n Biek-in mi suol

le thil tha lo a inthawk a mi vènghim pèk tlata din. Chun biek-in kâwla khawsa sâkhua dang zuituhai leh khawm inrem taka um tlàng pei a ni theina din.

18.02.2025 (Thawleni)

•India ram thuoituhaiin indik le fel taka ram an enkawl theina din: I. President, Prime Minister, Minister le MP-hai ta din II. State-hai a thuoituhai ta din (1 Timothy 2:1-4)

•India rama Kristien Organization/NGO/Church Leader-hai ta din: I. NGO-hai (IEM, EFI, World Vision India le dang dang) hmalâkna hratlema a fe pei theina din II. Sawrkâr thuneituhai lakah buoina tuok lo a, hrat taka hma an lâk theina din III. Kristien Organization thuoit le Church Lead- er-hai po po India ram siemthatna le sukhma- sawna dinga hmangruo pawimaw tak an hung ni pei theina din.

19.02.2025 (Nilaini)

•HCFD Nilaini Zân Tawngtai Inkhawm-Inkhawm Keihruoit: Tv. Joseph Lalruotien Joute, Thuhrlitu: Pi Niangboi Pudaite.

•India ram, abiktakin Chhattisgarh le state thenkhatah kristienhai chung a tharum insuona/ thawluina chi dang dang a tlung zing: Jan. 7, 2025 khan Chhindwara-ah pastor pakhat a thi a, kristien dân anga a ruong phûm ding an phal pèk nawh. Chun, Jan. 5 khan Raipur-ah kristien- hai an inkhawm lai chu vuok le biekin a kalkhum an nih. Sukdûdana le nèkchêpna hmunahai hin Chanchintha hriidara a um peina din.

20.02.2025 (Ningani)

•Shikohabad, UP Mission Field: I. Kohranhai hrisèlna dawnga Lalpa'n a huolhim sengna din. Sin khawm ringum le taima taka an thaw seng- na din. II. Sùngkuo inkhawmna hun le inpantuo inkhawmna hun kohran member thenkhatin an nei hlaka. Lalpa'n an inpawltlàngna mal a sâwm peina din. III. Shikohabad le a sêvêla mi tin kuomah Chanchintha a'ndar peina din.

21.02.2025 (Zirtawpni)

•India rama hin nasa nawk zuola Chanchintha puongdar a ni pei theina din: United Christian Forum-in a suklàng dânin kum 2024 sùng khan kristienhai chung a tharum insuona langsâr zuol 834 zet a tlung (kum 2023 khan 734 a tlung). Hienghai lai hin Manipur buoina le inzawma biekin 400 lai zet suksiet a um tah, thawluina hmanga Hindu sakhuo mi tam tak inlektir- na hai a thàng sa. Hienglai zing hin Arunachal Pradesh-a sakhuo inletha khuokhina dân (an- ti-conversion law tia hriet lâr) chu tu kum hin hmang tan dinga hma lâk mèk a ni baw.

22.02.2025 (Inrinni)

•Prawkram thenkhat tawngtaina ei lo hriet ding: I. Vawisûn hin HCFD DoM&YA-in 'Praise & Worship cum Thanksgiving' hun an hmang ding. II. Sandamna Campaign vawizân hin West Del- hi area-ah nei ding.

•IEM-a ei misawnari support Rev. Suraj Majhi, Bathinda, Punjab, rawngbawlna: Feb. 12, 2025 khan Nathana thalaihai puola din 'Youth Retreat' hlawtling taka hmang a nih. Hi taka hin thalai mi 26-hai chu Chanchintha an ruol-le-pai, u-le-nau le khuo-le-vènghai kuoma hriidar dinga chona pèk an nih a. Hieng thalaihai hin huosen, ring- um le hrât taka Chanchintha an puondar pei

theina din.

23.02.2025 (Pathienni)

•HCFD Chawibiek Inkhawm-Inkhawm Keihruoi- tu: Pu Hmingropui Hmar, Tantu: Pi Florence Pangamte, Thuhrlitu: Upa Sangremsiem, Pas- toral Prayer: Pastor Steven L. Infimate.

•Uttar Pradesh (UP)-a ringtu sukdûdana tuokhai ta din: January thla sùng khan UP-a kristien an rawngbawlna le inzawma police-in an man le khuokhina tuok an tam hle (Pasotor Shankar Lal Chaurasia, Pastor Kaushal, Rev. Samaren- dra, Pastor Shesmani le an kohran enkawlhai le ringtu dang tam tak). Rawngbawlna le inzawmin a thenin inthitheina an tuok a, a then an inkhaw- mlai chawkbuiin an um. UP-a hin ringtuhai nèkchêpna a zuol pei le inruolin ringtuhai nasa taka Lalpa'n a sukhâtina ding le Chanchintha hrat lema puongdar a hung ni pei theina din.

24.02.2025 (Thawtanni)

•Ei inchûklaihai ta din: I. Kum tâwp êkzam tan mèk an um tâwl a, tha taka êkzam an nei seng theina din. II. Abiktakin, Pâwl 10 le 12 êkzam mèkhai khawmin taksa hrisèlna tha dawnga, tha taka êkzam an hmasuon seng theina din. III. Sikul admisawn thaw thar dinghaiin tha taka an thaw fel seng theina din. IV. Competitive êk- zam/sin zawng mèkhai tam takin hlawtlingna an hung chang pei theina din.

25.02.2025 (Thawleni)

•Shikohabad, UP Mission Field rawngbawlna: I. Thalai kawppui mamaw iemanizât an um a, ringtu kawppui tha tak Lalpa'n a pèk sengna din. II. Inrinni thalai inkhawm prawkram nei hlak a ni a, Lalpa'n mal a sâwm peina din. Chun, thalai- haiin inkhawm nuomna lungril an nei peina ding khawmin.

26.02.2025 (Nilaini)

•HCFD Nilaini Zân Tawngtai Inkhawm-Inkhawm Keihruoit: Pu David Huolngo, Thuhrlitu: Tv. Fimruolsung Infimate. •HCFD-in tawngtai, thil- pèk le kawng hrang hranga ei rawngbawlnaah hrat lema hma ei pan pei theina din.

27.02.2025 (Ningani)

•Shikohabad, UP Mission Field: I. Sivara, Far- rukhabad district hmunah Pi Rajrani fethlengin Pathienni inkhawmna nei hlak a ni a. Pathien keihruoina dawnga member an pung peina din. II. Lilma, Budaun district a Pi Reshma fe thlen- ga inkhawmna Lalpa'n mal a sâwm zawm peina din. Pi Reshma hi Bible tiem thei ve tâwk tâwk a ni a, Lalpa'n varna le thilthawtheinaa a'n thuom peina din. III. Tuition le music class-a thàng ding Lalpa'n naupang tam tak a pèk peina din.

28.02.2025 (Zirtawpni)

•Lawmthu hirina: I. Thla tâwp thuoi tlunga ei um leiin. II. Rawngbawlna hun tha pèkin ei um zing. III. Ei tawngtainahai dawna umin, damnawhai- in damna an chang pha hlak leiin. IV. Ringthar pèk belsain ei um pei. V. Pathien kuoma ei lo intlun hlak angin Manipur le Mizoram (Hmarbiel) infepawna (Tuivai leilâk) a tak ngêia hmang thei dinga a um tâk leiin. VI. Ei pastorhaiin 'San- damna Campaign' an nei Lalpa'n mal a sâwm peia, Sandamna thua inhrechieng thar an um pei leiin. •Suol thuphachawina (1 John 1:9-10) le Pathien kuoma inhlantharna (Rom 12:1-2).